



Sara Olsvig  
Inatsisartut

### §37 004 Immikkut siunnersortit

Naalakkersuisut ulloq 8. januar 2014 Inatsisartut Suleriaasianni § 37 naapertorlugu Inatsisartuni ilaasortamit, Sara Olsvigimit, Inuit Ataqtigiit, apeqqutinik ima ittunik tigusaqarput.

Apeqquteqaatinut akissut:

1. Immikkut siunnersortit pillugit kaajallaasitaq immikkut siunnersortinik atorfinitsitsinermi tamanut ammasumik allagarsiussaqaqqaarnissamik piu-masaqaateqarfiunngitsoq atortuulersikkamikku inatsit suna Naalakkersuisut periarfissaliissutitut tunngavigivaat?

**Akissut:**

Immikkut siunnersortit pillugit kaajallaasitaq Naalakkersuisut akuerinikuunngilaat. Kaajallaasitaq naalakkersuisoqarfinni pisortaqtigiinnit aallarnisarneqarpoq akuersissutigineqarlunilu, tamatumalu kingorna Naalakkersuisunut ilisimatissutigineqarluni. Uani pisumi kaajallaasitaq suliffeqarfiup iluani Naalakkersuisoqarfiit allaffissorneranni malittarisassiaavoq. Taamaattumik kaajallaasitaq inatsisunik tunngaveqartariaqanngilaq. Naalakkersuisut allaffissorneranni ingerlatsineranni sulisunik atorfinitsitsisarneq Aningaasanut Inatsimmi kontomi aningaasarsianut aningaasaliiffigineqarsimasumiippoq.

2. Immikkut siunnersortit Naalakkersuisuni ilaasortat ataasiakkaat partiiminnut attuumassuteqartunut tunngasunik ikiuuffigisinnaagaat Naalakkersuisut aalajangiiffigamikkukku suna tunngavilersuutigivaat?

**Akissut:**

Naalakkersuisut ulluinnarni sulinerisa annertusiartuinnartumik ulapiffiuiartuinnarnerata sulisumik naalakkersuisoqarfiup partiillu akornanni attaveqaatitut atuussinnaasumik sulisoqarnissaa pisariaqartilersimavaa. Taamatut partiimut attuumassuteqartumik suliaqarneq atorfilittanit nalinginnaasunit ingerlanneqarsinnaanngilaq.

3. Ministerip allattuisa immikkullu siunnersortit suliassaasa suna assigiinngis-sutigivaat?

**Akissut:**

Nalinginnaasumik naalakkersuisumut allatsip naalakkersuisup ullorsiuatai, allagarsiai, sulianik suliarinnittunut attaveqarnera kiisalu suliassat assigiinngitsut Naalakkersuisunut ilaasortamut attuumassuteqartut suliarisussaavai. Naalakkersuisumut allatsi partiimi sulianut akulerutsinneqassanngilaq.

23-01-2014  
Sags nr. 2014-095206  
Dok. nr. 1464100

Postboks 1015  
3900 Nuuk  
Tlf. (+299) 34 50 00  
Fax (+299) 32 50 02  
E-mail: govsec@nanoq.gl  
www.naalakkersuisut.gl

Immikkut siunnersortip siunnersuineq ikiuinerlu isumagissavai – soorlu assersuutigalugu – oqalugiaatissanik suliaqarneq, partiimut attaveqarneq, suliassat tusagassiorfinnut attuumassuteqartut il.il. Suliassat kaajallaasitami allassimapput.

4. Ministerip allattuusa immikkullu siunnersortit akissarsiaat qanoq nikingasuteqarpat?

**Akissut:**

Naalakkersuisumut allatsip aningaasarsiai pineqartup tunuliaqutaa apeqqutaatillugu isumaqatigiissutit assigiinngitsut pingasuusinnaapput, aningaasarsiallu taakku malillugit nikerarput.

Immikkut siunnersorti aningaasarsisarpoq soraarnerussutisisarlunilu allaffimmi pisortap aningaasarsiaasa qaffaseqataanik – tamanna kaajallaasitami allassimavoq.

5. Kaajallaasitaq malillugu immikkut siunnersortit atorfinitsinneqartut partiimi sulinerlut atattillugu ilanngullugu ikiuutaalersinneqarnerisigut partiinut Naalakkersuisuutitaqanngitsunut naleqqiullugit partiit Naalakkersuisuuti-taqartut Nunatta Karsiata akiligaanik siunnersorteqarnikkut iluanaarti-taernerulersinneqarnerat Naalakkersuisut qanoq isumaqarfigivaat?

**Akissut:**

Partiinut aningaasaliissutit partiit Inatsisartuni ilaasortaataa amerlassusaat naapertorlugu tunniunneqartarput.

Partiit qinersereernerup kingorna naalakkersuisooqatigiillersut Naalakkersuisunngortullu Inatsisartuni inatsiliornermi suliaminnut annertuumik akisussaafeqarput illuatungiliuttut ilagalugit, saniatigullu nunatsinni inatsinik atuutsisinerlut aqutsisutut pissaanermik ingerlatsinerlut akisussaafeqarput. Tamanna suliassat ataqatigiissaarinerullu annertunerulernerannik kinguneqarpoq.

6. Naalakkersuisut isumaqarpat danskit ingerlatseriaasianni immikkut siunnersorteqartoqarneranik apeqqusiinani ilaarsineq nunatsinni pissutsinut Danmarkimut naleqqiullugu Naalakkersuisut tusagassiuutillu akornanni qanimoornerusumik nalinginnaasumik atassuteqartoqarfioreersunut tulluar-tuusooq?

**Akissut:**

Naamik, apeqquseeqqaarnani ilaarsineq pitsaasuunngilaq, taamaattumillu kaajallaasitaq maanna atuuttoq nunatsinni pisariaqartitatsinnik pissutsisinniillu aallaaveqarpoq danskillu kaajallaasiaat isumassarsiorfigineqarsimavoq. Assersuutigalugu immikkut siunnersorti Kalaallit Nunaanniittoq, Inatsisartuni ilaasortap ataani spindoktorinik taakkartugaanniit, appasinnerujussuarmik aningaasarsiaqassaaq.

Ullumikkut politikkikkut tamanut ammasumik oqallinneq ukiualuit matuma siornatigornit naleqqiullugu sukkaneruvoq. Tusagassiuutit nunatsinniittut, taakkununga ilanngullugit internetikkut tusagassiuutit, tusagassiuutit danskit nunanit allaneersullu oqaaseqaqqusillutik kissaataat sakkortusisimapput. Naalakkersuisut isumaqarput, taamatut ineriartorneq naapertorlugu sulisoqartariaqartoq pitsaanerusemillu suliarineqartariaqarluni.

7. Immikkut siunnersortit, spindoktorit aamma taaneqartartut, attaveqatigiinnermut tunngasunik suliassaqarajuttuusarput aammalu ministerit tusagassiuutillu akornanni attaveqaataasartuullutik. Naalakkersuisut isumaqarpat

tusagassiuutit Naalackersuisullu akornanni allat saniatigut attaveqaateqartoqalernera tamanna pisariaqartinneqartoq, aamma Naalak-kersuisut isumaqarpat taamaattoqarnera inuiaqatigiinni kalaallini tulluar-tuusoq?

**Akissut:**

Tusagassiuutit Naalackersuisunut ilaasortat suli toqqaannartumik apersorsinnaassavaat. Taassuma saniatigut apeqqummut 6-imut akissummut innersuussissaanga.

Inussiarnersumik inuulluaqqusillunga



Aleqa Hammond  
Naalackersuisut Siulittaasuat